

Minister President Oduber ta recorda fecha natalicia di inmortal libertador Betico Croes

ORANJESTAD - Dia 25 di januari nos ta recorda e fecha natalicio di un gran Arubiano, un gran politico y estadista, esta nos Libertador Gilberto Francois (Betico) Croes. Tabata na aña 1994 - durante di Gabinete Oduber II - cu nos gobierno a decreta e fecha di 25 di januari como un dia oficial di Aruba; un fecha cu

mester sirbi como un dia di reflexion pa e generacion aki y e generacionnan cu ta bini keda recorda Betico Croes den feliz memoria. Historia ta muestra cu e pueblo Arubano desde añanan 40 tabata anhela un Aruba cu su propio gobierno den Reino y lazonan especial cu Hulanda. Pa logra e ideal aki mas cu un

politico a purba di haci algo na e sistema estatal pero ningun di nan no a logra. Betico Croes den feliz memoria tabata un politico cu Todopoderoso a manda cu un mision special pa cumpli cune, esta saca Aruba for di e constelacion Antiyano. Sinembargo Betico Croes tabata consciente di e hecho



cu pa logra e deseo sagrado aki mester tin un union fuerte den e pueblo Arubano y cu mester pone un fin na e distincion entre pover y rico, entre razanan, entre campo y playa y tur otro factornan cu tabata separa nos pueblo. Nos Libertador tabata di firma conviccion cu e vehiculonan principal pa logra e Union den e pueblo Arubano ta nos simbolonan di union y libertad, esta nos himno y bandera, cu a wordo inaugura oficialmente dia 18 di maart 1976. Nos pueblo bao di su guia e lucha incansabel pa reconocimiento di e derecho di autodeterminacion. Nos tambe mescos cu cualkier otro nacion tin derecho pa determina nos propio destino. Ta danki na e lucha y insistencia di Betico Croes pa logra e Status Aparte tan anhela cu awe Aruba tin su propio Constitucion, Consejo di Minister, Gobernador, Parlamento, Banco Central, Procurador General etc. Cu awe nos tur por bati riba nos pecho, canta nos himno, hisa nos bandera y grita sin miedo biba Aruba ta danki na e gran inspiracion cu Todopoderoso a duna e Libertador di Aruba. Gobierno di Aruba ta spera cu e memoria di Betico Croes lo keda bibo den curazon di cada Arubiano y cu tur aña e pueblo lo sigui conmemora grandemente e gran estadista aki riba su fecha natal. Betico, pa bo pueblo Arubano bo ta keda inmortal y semper lo bo keda den nos memoria.